

Fatahmand Zindagī



Rūhul-quds kā Kām

fatahmand zindagī. rūhul-quds kā kām

Victorious Living. The Work of the Holy Spirit

by Bakhtullah

[Ao, Khud Dekh Lo 28]

(Urdu—Roman script)

© 2024 www.chashmamedia.org

published and printed by

Good Word, New Delhi

The title cover is contains OpenClipart-Vectors
<https://pixabay.com/vectors/pigeon-dove-peace-dove-148038/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Rūh se Merī Qurbat Pāo	2
Rūh se Mere Pyār kā Bandhan Pāo	8
Rūh se Merā Ṭhappā Pāo	13
Rūh se Merī Salāmatī Pāo	15
Injīl, Yūhannā 14:15-31	17

Har insān kāmyāb honā chāhtā hai. Har ek apne ghar wāloñ ke lie izzat aur sukh kā bāis honā chāhtā hai. Ham sab fathmand zindagī guzārnā chāhte haiñ—aisī zindagī jo har challenge kā sāmna kar pāe, har rukāwaṭ par ghālib āe.

► *Lekin ham kis tarah fathmand rah sakte haiñ?*

Īsā Masīh ne is kā sāf jawāb diyā. Īsā Masīh jāntā thā ki thoṛī der bād mujhe is duniyā se kūch kar jānā hai. Islie zarūrī hai ki apne shāgirdoñ ko kuchh hidāyāt dūñ. Ab us ne ek naī bāt chheṛī. Ek aisī bāt jo shāgird us waqt nahīñ samajh sakte the. Bāt kyā thī? Rūhul-quds.

► *Us ne Rūhul-quds kī bāt kyon chheṛī?*

Wuh shāgirdon̄ ko is bāt ke lie taiyār karnā chāhtā thā ki mere jī uṭhne ke bād Rūhul-quds nāzil hogā.

- *Lekin Rūhul-quds ke āne kā kyā maqsad thā? Use pāne se hamen̄ kyā hāsil hotā hai?*

Is kā muḫtasar jawāb yih hai ki us se hamen̄ fathmand zindagī hāsil hogī. Fathmand zindagī guzārne men̄ Rūhul-quds hamārī madad karegā.

- *Rūhul-quds fathmand zindagī guzārne men̄ hamārī madad kis tarah karegā?*

Is sawāl kā jawāb Īsā Masīh denā chāhtā thā. Pahlī bāt,

Rūh se Merī Qurbat Pāo

Īsā Masīh ne farmāyā,

Agar tum mujhe pyār karte ho to mere ahkām ke mutābiq zindagī guzāroge. Aur main̄ Bāp se guzārish karūngā to wuh tum ko ek aur madadgār degā jo abad tak tumhāre

sāth rahegā yānī sachchāī kā Rūh, jise duniyā pā nahīn saktī, kyoṅki wuh na to use dekhtī na jāntī hai. Lekin tum use jānte ho, kyoṅki wuh tumhāre sāth rahtā hai aur āindā tumhāre andar rahegā.

(Yūhannā 14:15-17)

► *Kaun Masīh ke ahkām ke mutābiq zindagī guzāregā?*

Wuh jo use pyār kartā hai. Masīh ke pīchhe ho lene kā yih matlab nahīn ki ham use apnā vote deñ. Use pārṭībāzī se nafrat hai. Wuh ek hī bāt chāhtā hai. Yih ki ham use pyār karen. Kyoṅki use pyār karenge to khud ba khud us ke ahkām ke mutābiq zindagī guzārenge.

Ājkal solar light ām ho gāī hai. Dhūp mein us kī battery, solar panel se charge hone lagtī hai. Andherā shurū huā to light on ho jātī hai. Matlab hai jo bijlī solar panel se paidā huī hai wuh light ke lie istemāl hotī hai.

Ham bhī us jaisī light haiñ. Hamārā bas ek hī kām hai, yih ki Īsā Masīh kī muhabbat-bharī dhūp señkeñ. Us kī muhabbat jazb kar lene se hamārī muhabbat bhaṛak uṭhtī hai aur ham solar panel kī light kī tarah duniyā ke andhere meñ us kī raushnī phailāne lagte haiñ. Yahī Īsā Masīh kā matlab hai: Jab ham use pyār karte haiñ to us kī muhabbat-bharī dhūp señkte haiñ. Tab hī ham us ke ahkām par chal pāeñge.

► *Lekin Īsā Masīh ko Bāp ke pās jānā thā. Us ke bād shāgird kis tarah us kī dhūp señk sakte the?*
 Ḳhudā Bāp ek aur madadgār degā.

► *Pahlā madadgār kaun thā?*
 Pahlā madadgār Īsā Masīh thā jo ab kūch kar jāne wālā thā. Islie Bāp ek aur madadgār bhejegā.

► *Yih madadgār kaun hai?*
 Sachchāī kā Rūh yānī Rūhul-quds. Wuhī Masīh ke jī uṭhne ke bād shāgirdoñ par nāzil hogā. Us waqt se wuh har sachche imāndār

kī madad karegā. Agar Bāp sūraj hai to Farzand sūraj kī raushnī aur Rūhul-quds sūraj kī garmī hai.

► *Kyā duniyā Rūhul-quds ko pā saktī hai?*

Nahīn.

► *Kaun Rūhul-quds ko pā saktā hai?*

Sirf wuh jo Īsā Masīh par īmān rakhtā hai.

► *Is kā kyā matlab hai ki ‘Tum madadgār ko jānte ho, kyonki wuh tumhāre sāth rahtā hai’? Yih madadgār hāl hī meñ kis tarah shāgirdoñ ke sāth rahtā thā? Us waqt to Rūhul-quds nāzil nahīn huā thā.*

Hāl meñ Īsā Masīh khud un kā madadgār thā. Wuhī un ke sāth rahtā thā. Shāgird use aur us ke kām apnī ānkhoñ se dekh sakte the, use apne hāthoñ se chhū sakte the. Yoñ shāgird use jānte the, aur wuh un kī madad kartā rahtā thā.

Īsā Masīh yahī kuchh kahnā chāhtā thā: Is waqt maiñ hī tumhārā madadgār hūñ jis

meñ Rūhul-quds bastā hai. Lekin āindā Rūhul-quds nāzil hokar tumhāre hī andar rahegā. Us meñ main̄ khud tumhāre dilōñ meñ maujūd hūngā. Islie ghabrāne kī zarūrat nahīñ hai—jo muhabbat aur sahāytā tumheñ is waqt hāsil hai wuh āindā bhī hāsil hogī.

Ab ham us kī aglī bāt bhī samajh sakte haiñ:

Maiñ tum ko yatīm chhoṛkar nahīñ jāūngā balki tumhāre pās wāpas āūngā. Thoṛī der ke bād duniyā mujhe nahīñ dekhegī, lekin tum mujhe dekhte rahoge. Chūñki main̄ zindā hūñ islie tum bhī zindā rahoge. (Yūhannā 14:18-19)

► *Īsā Masīh kis tarah wāpas āegā?*

Jī uṭhne ke bād wuh kuchh dinoñ ke lie apne shāgirdoñ par zāhir hogā. Phir wuh uṭhā liyā jāegā aur Rūhul-quds nāzil hogā. Rūhul-quds ke nāzil hone par wuh bhī Rūhul-quds

meñ hāzir hogā. Yahān Masīh isī par zor de rahā hai ki wuh Rūhul-quds meñ hāzir hogā.

- *Us waqt duniyā use nahīn dekhegī lekin imāndār use dekhte raheñge. Wuh kis tarah use dekhte raheñge?*

Wuh Rūhul-quds ke zariye use dekhte raheñge. Rūhul-quds ke zariye wuh un ke dilon meñ maujūd hogā. Aur chūnki wuh zindā hai islie wuh bhī zindā raheñge. Jis zindagī se wuh maut par ghālib āyā wuhī zindagī unheñ hāsil hogī.

Rūhul-quds ke āne par imāndār ko Masīh kī yih qurbat ekdam mālūm ho jāegī. Īsā Masīh ne farmāyā,

Jab wuh din āegā to tum jān loge ki main apne Bāp meñ hūñ, tum mujh meñ ho aur main tum meñ.

(Yūhannā 14:20)

Kitnī gahrī qurbat! Masīh Bāp meñ hai aur wuh ham meñ bhī hai. Yahī wajah hai ki ham Ḳhudā

ke ghar wāle haiñ. Isī lie ham us ke huzūr rah sakte haiñ. Aur yih gahrī qurbat Rūhul-quds se paidā ho gai hai. Usī ke wasīle se yih rishtā aur rifāqat hameshā tar-o-tāzā rahtī hai.

Agar mobile kā signal na ho to wuh be-kār hai. Isī tarah hamārī Ḳhudā se rifāqat Rūhul-quds ke wasīle se paidā hotī hai. Wuhī mobile kā signal hai. Usī se ham har waqt Ḳhudā ke huzūr rah sakte haiñ, dukh-sukh kī har bāt us ke sāmne rakh sakte haiñ.

Īsā Masīh Rūhul-quds ke bāre meñ ek aur bāt bhī kahnā chāhtā hai. Yih ki

Rūh se Mere Pyār kā Bandhan Pāo

Īsā Masīh ne farmāyā,

Jis ke pās mere ahkām haiñ aur jo un ke mutābiq zindagī guzārtā hai, wuhī mujhe pyār kartā hai. Aur jo mujhe pyār kartā hai use merā Bāp pyār karegā. Maiñ bhī use pyār karūngā aur apne āp ko us par zāhir karūngā. (Yūhannā 14:21)

- ▶ *Jo Īsā Masīh ke ahkām par chaltā hai wuh kyā kartā hai?*

Wuh Īsā Masīh ko pyār kartā hai.

- ▶ *Jo Īsā Masīh ko pyār kartā hai use kaun pyār kartā hai?*

Ḳhudā Bāp aur Īsā Masīh.

Yon ek bandhan hai jo imāndār ko Ḳhudā Bāp aur Ḳhudā Farzand ke sāth joḡ detā hai.

- ▶ *Bandhan kyā hai?*

Pyār—wuh pyār jis se Rūhul-quds imāndār ko Ḳhudā ke sāth jakḡ rakhtā hai.

- ▶ *Jo Masīh ko pyār kartā hai us ke sāth Īsā Masīh kyā karegā?*

Wuh apne āp ko us par zāhir karegā.

- ▶ *Apne āp ko pyār karne wāle par zāhir karne se kyā farq partā hai?*

Apne āp ko pyār karne wāle par zāhir karne se us ke sāth rifāqat baḡhtī jāegī. Jitne ham use pyār karenge utnā hī wuh ham par zāhir ho jāegā, utnā hī hamārī us ke sāth rifāqat baḡh jāegī.

Ab ek shāgird ne pūchhā, “Ḳhudāwand, kyā wajah hai ki āp apne āp ko sirf ham par zāhir kareᅅge aur duniyā par nahīn?”

► *Shāgird ne yih kyon pūchhā?*

Īsā Masīh farmā chukā thā ki shāgirdoᅅn aur duniyā kā koī sambandh nahīn hai. Duniyā Rūhul-quᅅds ko pā hī nahīn saktī. Ab us ne farmāyā thā ki main apne āp ko sirf us par zāhir karūᅅgā jo mujhe pyār kartā hai. Lekin shāgird to abhī tak samajhte the ki wuh thoᅅrī der bād Yarūshalam meᅅn bādshāh ban kar sab par zāhir ho jāegā. Islie shāgird kā yih sawāl ki āp apne āp ko duniyā par zāhir kyon nahīn kareᅅge? Āp kyon sirf ham par zāhir ho jāeᅅge? Īsā Masīh ne jawāb diyā,

Agar koī mujhe pyār kare to wuh mere kalām ke mutābiq zindagī guzāregā. Merā Bāp aise shaḳhs ko pyār karegā aur ham us ke pās ākar us ke sāth sukūnat kareṅge. (Yūhannā 14:23)

Ek hī shart hai ki Īsā Masīh kisī par zāhir ho jāe.

► *Shart kyā hai?*

Yih ki wuh Īsā Masīh ko pyār kare.

► *Masīh ko pyār karne se kyā hogā?*

Wuh us ke kalām ke mutābiq zindagī guzāregā.

► *Tab kyā hogā?*

Phir Ḳhudā Bāp use pyār karegā aur wuh apne Farzand samet us ke pās ākar us ke sāth sukūnat karegā. Dūsre alfāz meñ wuh us meñ apnā ghar banā leṅge. Kitnī azīm bāt!

Lekin duniyā kabhī Īsā Masīh se muhabbat nahīn kartī, na us kī bātoñ ke mutābiq zindagī guzārtī hai. Islie Masīh kabhī duniyā par zāhir nahīn ho saktā. Kisī par zāhir honā us se gahrī

rifāqat rakhne ke barābar hai, wuh rifāqat jo sirf ghar wāloñ meñ hotī hai.

Yih bāt ham par bhī sādiq ātī hai. Īsā Masīh duniyā par zāhir nahīn hotā. Is se koī farq nahīn paṛtā ki us ke nām meñ baṛī baṛī ibādatgāheñ ban gaī haiñ, ki logoñ ne us kā nām lekar qatl-o-ghārat machāī hai, us kā nām lekar daulat aur shān-o-shaukat hāsil kī hai. Īsā Masīh duniyā kī dhūmdhām par zāhir nahīn hotā.

► *Wuh kyon nahīn duniyā par zāhir hotā?*

Kyonki duniyā use pyār nahīn kartī, us ke ahkām par nahīn chaltī. Use Rūhul-quds hāsil nahīn hai islie Ḳhudā se rifāqat ho nahīn saktī. Hāñ, adālat ke din wuh duniyā par bhī zāhir ho jāegā, lekin rifāqat rakhne ke lie nahīn balki us kī adālat karne ke lie. Tab Īsā Masīh ne Rūhul-quds ke bāre meñ ek tīsri bāt batāī. Yih ki

Rūh se Merā Ṭhappā Pāo

Īsā Masīh ne farmāyā,

Yih sab kuchh mainne tumhāre sāth rahte hue tum ko batāyā hai. Lekin bād meñ Rūhul-quds, jise Bāp mere nām se bhejegā tum ko sab kuchh sikhāegā. Yih madadgār tum ko har bāt kī yād dilāegā jo mainne tum ko batāi hai. (Yūhannā 14:25-26)

Īsā Masīh ke chale jāne ke bād Ḳhudā Bāp Rūhul-quds ko bhejegā.

► *Yih madadgār kyā karegā?*

Wuh sab kuchh sikhāegā. Yānī wuh Masīh kī har bāt kī yād dilāegā.

► *Yih karne kā kyā maqsad hai?*

Maqsad yih hai ki wuh ham par Masīh kā ṭhappā lagāe.

► *Ṭhappā lagāne kā kyā matlab hai?*

Kāghaz par ṭhappā lagāne kā matlab yih hai ki mohr lagāyā jātā hai. Ṭhappā lakaṛī kā wuh ṭukṛā bhī hotā hai jis par ubhre hue

bel-būṭe bane rahte haiñ aur jis par log rang potkar un bel-būṭoñ ko kapre par chhāpte haiñ. Ṭhappe kā matlab sāñchā bhī hotā hai jis meñ miṭṭī yā koī aur chīz ḍhalkar sāñche kī shakl apnātī hai.

Jab ham Rūhul-quḍs pāte haiñ to Masīh kā ṭhappā ham par lag jātā hai.

► *Masīh kā ṭhappā lagne kā kyā matlab hai?*

- Rūh ham par Masīh kā mohr lagātā hai. Mohr lagāne se yih bāt pakkī ho jātī hai ki ham Masīh ke haiñ.
- Rūh ham par Masīh kā azīm design yoñ chhāptā hai, jis tarah safed kapre par rangdār ṭhappā lagtā hai.
- Rūh hameñ Masīh ke sāñche meñ ḍhāltā hai. Tab ham Masīh kī sūrat meñ badalte jāte haiñ. Us kī muhabbat, us kī halīmī, hāñ us kā pūrā wujūd hamāre andar zor pakartā jātā hai.

Phir Īsā Masīh ne ek āḅhirī hidāyat dī. Yih ki

Rūh se Merī Salāmatī Pāo

Īsā Masīh ne farmāyā,

Main tumhāre pās salāmatī chhoṛe jātā hūñ, apnī hī salāmatī tum ko de detā hūñ. Aur main ise yoñ nahīñ detā jis tarah duniyā detī hai. Tumhārā dil na ghabrāe aur na ḍare. (Yūhannā 14:27)

► *Īsā Masīh kyā chhoṛe jātā hai?*

Salāmatī.

► *Yih kis kī salāmatī hai?*

Yih us kī apnī salāmatī hai.

► *Kyā duniyā yih salāmatī de saktī hai?*

Nahīñ.

► *Kyoñ nahīñ?*

Īsā Masīh ne apnī salībī maut se wuh chīz miṭā dī jo hamēñ Ḳhudā se judā kartī hai yāñī hamāre gunāhoñ ko. Is se ham jo īmān lāe haiñ Ḳhudā ke ghar wāle ban gae haiñ. Aur yih salāmatī hamāre diloñ meñ rahtī hai.

- *Yih salāmatī kis tarah hamāre dilon̄ meñ rahtī hai?*

Rūhul-quds ke zariye. Wuhī hamāre dilon̄ meñ yih salāmatī basā detā hai. Isī wajah se ghabrāne kī zarūrat nahīn hai. Īsā Masīh to chalā gayā lekin Rūhul-quds ke zariye us kī salāmatī hamāre sāth rahtī hai.

Duniyā yih salāmatī nahīn dilā saktī. Wuh to daulat, shān-o-shaukat aur aish-o-ishrat de saktī hai. Lekin wuh yih salāmatī nahīn de saktī.

- *Īsā Masīh yih sab kuchh kyon̄ shāgirdon̄ ko batā rahā thā?*

Us ne farmāyā,

Maiñne tum ko pahle se batā diyā hai, is se peshtar ki yih ho, tāki jab pesh āe to tum imān lāo.
(Yūhannā 14:29)

Shāgirdon̄ ko yih jānane kī zarūrat thī ki Īsā Masīh kī dukh-bharī rāh Ḳhudā ke mansūbe

ke mutābiq thā. Us waqt wuh nahīn samajh sakte the ki yih madadgār kyā hai aur us kā hamāre sāth kyā tālluq hai. Lekin bād meñ Rūhul-quds un par nāzil huā. Tab us ne unheñ Masīh kī qurbat aur pyār kā bandhan dilāyā. Us ne un par Masīh kā ṭhappā lagā diyā, aur unheñ Ḳhudā kī gahrī salāmatī hāsil huī.

► *Kyā āpne Rūhul-quds pā liyā hai?*

Injīl, Yūhannā 14:15-31

Agar tum mujhe pyār karte ho to mere ahkām ke mutābiq zindagī guzāroge. Aur main Bāp se guzārish karūngā to wuh tum ko ek aur madadgār degā jo abad tak tumhāre sāth rahegā yānī sachchāī kā Rūh, jise duniyā pā nahīn saktī, kyonki wuh na to use dekhtī na jāntī hai. Lekin tum use jānte ho, kyonki wuh tumhāre sāth rahtā hai aur āindā tumhāre andar rahegā.

Main tum ko yatīm chhoṛkar nahīn jāūngā balki tumhāre pās wāpas āūngā. Thoṛī der ke bād duniyā mujhe nahīn dekhegī, lekin tum mujhe dekhte rahoge. Chūnki main zindā hūn islie tum bhī zindā rahoge. Jab wuh din āegā to tum jān loge ki main apne Bāp meñ hūn, tum mujh meñ ho aur main tum meñ.

Jis ke pās mere ahkām haiñ aur jo un ke mutābiq zindagī guzārtā hai, wuhī mujhe pyār kartā hai. Aur jo mujhe pyār kartā hai use merā Bāp pyār karegā. Main bhī use pyār karūngā aur apne āp ko us par zāhir karūngā.”

Yahūdāh (Yahūdāh Iskariyotī nahīn) ne pūchhā, “Ḳhudāwand, kyā wajah hai ki āp apne āp ko sirf ham par zāhir karenge aur duniyā par nahīn?”

Īsā ne jawāb diyā, “Agar koī mujhe pyār kare to wuh mere kalām ke mutābiq

zindagī guzāregā. Merā Bāp aise shaḵhs ko pyār karegā aur ham us ke pās ākar us ke sāth sukūnat karenge. Jo mujh se muhabbat nahīn kartā wuh merī bāton ke mutābiq zindagī nahīn guzārtā. Aur jo kalām tum mujh se sunte ho wuh merā apnā kalām nahīn hai balki Bāp kā hai jis ne mujhe bhejā hai.

Yih sab kuchh mainne tumhāre sāth rahte hue tum ko batāyā hai. Lekin bād meñ Rūhul-quds, jise Bāp mere nām se bhejegā tum ko sab kuchh sikhāegā. Yih madadgār tum ko har bāt kī yād dilāegā jo mainne tum ko batāī hai.

Main tumhāre pās salāmatī chhoṛe jātā hūñ, apnī hī salāmatī tum ko de detā hūñ. Aur main ise yoñ nahīn detā jis tarah duniyā detī hai. Tumhārā dil na ghabrāe aur na ḍare. Tum ne mujh se sun liyā hai ki ‘Main jā rahā hūñ aur tumhāre pās wāpas

āūngā.’ Agar tum mujh se muhabbat rakhte to tum is bāt par ḡhush hote ki main Bāp ke pās jā rahā hūn, kyonki Bāp mujh se baṛā hai. Mainne tum ko pahle se batā diyā hai, is se peshtar ki yih ho, tāki jab pesh āe to tum īmān lāo. Ab se main tum se zyādā bāteñ nahīn karūngā, kyonki is duniyā kā hukmrān ā rahā hai. Use mujh par koī qābū nahīn hai, lekin duniyā yih jān le ki main Bāp ko pyār kartā hūn aur wuhī kuchh kartā hūn jis kā hukm wuh mujhe detā hai.

Ab uṭho, ham yahāñ se chaleñ.